

## 70 өрк-бүл эврә гертән орв

Иджл голин эрг деер Юстинск района центр Бурунный поселк бәәнә. Энд ик гидг тосхлтин кәдлмш кегдджәнә. Тосхлтин комплексн бригадт 43 комсомольцнр болн союзн биш багъчуд кәдлджәнә. Эн комплексн бригадиг үр Гильджиров Д. М. гардджана.

Иджл голин эрг дахад шинәс ут сәәхн уульнц тосхгдсн бәәнә. Энүнд шанъгъа, хошад пәтртә 12 гер, дөрвәд пәтртә 3 гер бәргддж дуусгдв. 8 пәтртә нег гер, дөрвәд пәтртә тавн гер шидрәс дуусгдджана. Кәдлмшчнр эврәннь гермүд бәрәд, нег ик гидг уульнц бүрдәгъәд, гермүдтән орад, ик джиргъл кецхәв; энүнд 70 гер бәәнә.

Тосхлтин бригад районн центрт бас чолугъар кесн школ, хот уудг гер, райсоюзин контор болн складмуд, нань чигн гермүд тосхджана.

Тосхлтин комплексн бригад авсн даалгъврән болзгаснь урд кӯцәхин төлә социалистическ дөрлдә делгрүлдж йовна. Эн бригад Приозерн района тосхлтин бригадла дөрлдджәнә.

Районн центр деер кәдлджәх тосхачнр эврәннь килмджән өгәд, кех кәдлмшин кемджәг 200—250 процент кӯцәдж, сардан 700—1200 арслнь мәнъг шинъгәцхәнә.

Тосхлтин бригадт кәдлджәх комсомольцнр болн союзн биш багъчуд шишлнь кех кәдлмшиннь хөөн эврән бийсдән гермүд бәрдж авчацхана. Багъчуд бийдән гер бәрхләрн цугъарн ирдж, нег-негндән дөнъ-нөкд болцхана. Горький балгъсна кәдлмшчнрин дамшлт олзлдж, гермүд тосхджацхана.

Эн дамшлтиг, районн центрт гермүд бәрлгънд олзлхин тускар түрүн болдж тосхлтин бригадир үр Гильджиров эк татв.

Алдр Октябрин 40-ч джилн өөнин байрт белдхләрн, тосхлтин бригадин кәдлмшчнр шин кӯцврмүд бәрдж, советск олн-әмтн коммунизмүр йовлгъна сарул чик хаалгъдшин диилврмүд кӯцдж тосхар бәәнә.

БАКАН Анъгърг.